

Uztailaren 4an  
**URTEAN ZEHARREKO 14. IGANDEA**

**Agurra**

Gure bihotza Jainkoa maitatzera zuzentzen duen Jauna izan bedi zuekin.

**Sarrerako oharpena**

Igandeko Eukaristian bildu gara, askatasun osoz. Askatasun horrek eraman gaitzake Jainkoa baztertzera ere, baina gu hemen gaude, pozik. Salbamenaren oparia onartzeko gogoz. Bihotzera mintzo zaigun Jainkoari entzun nahiez. Ospa dezagun pozik misterio hau.

**Damu-otoitza**

Eukaristi ospakizun honen hasieran, eska diezaiogun Jainkoari bihotz-berritzearen grazia; horrela baketzea lortuko dugu eta elkartuago egongo gara Jainkoarekin eta geure senideekin.

—Jesus Jauna, gu kondenatzera ez, baizik salbatzera etorri zarena: erruki, Jauna.

—Jesus Jauna, bihotz-berritzen den bekatari bakar batengatik, zeruan poz handia izango dela esan zenuena: Kristo, erruki.

—Jesus Jauna, asko maite izan duenari asko barkatzten diozuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

**Otoitza**

**Oi Jainko, zure Semearen beheratzeaz,  
jaso egin duzu eroria zegoen mundua;**

eman zeure fededunei egiazko pazko-poza,  
 bekatuaren uztarpetik askatu dituzunek  
 goza dezatela betiko zoriona.  
 Zure Seme Jesu Kristo gure Jaunaren bitartez,  
 Zurekin eta Espiritu Santuarekin batean  
 Jainko eta Errege bizi baita gizaldi eta gizaldietan.

### Hitzaren liturgiari oharpena

Jainkoaren handitasuna, gizon-emakumeon txikitasunean eta ahultasunean agertzen da. Ezaugarri handiak espero dituenak ez, baizik eguneroko jardunean pozik bizi denak aurkitzen du egiaz Jainkoaren agerpena.

### Lehenengo irakurgaia (Ez 2, 2-5)

Ezekielen Profezia liburutik

Egun haietan, Jaunaren espiritua sartu zen niregan eta zutik jarri ninduen, eta hitz egiten zidanari entzun nion esaten: «Gizaseme, israeldarregana bidaltzen zaitut, jende bihurri horregana; horiek eta horien arbasoak nire aurka altxatu dira gaurdaino. Seme-alaba burugogor eta setatsu horiengana bidaltzen zaitut nire mezua adieraztera. Horrela, entzun ala ez, jakingo du herri bihurri horrek baduela profeta bat bere artean».

### Erantzun-salmoa (Sal 123 [122], 1. 2. 3-4)

E-rru - ki hu - tsa du - gu Jau - na, e - rru - ki - a  
 ta mai - ta - su - na.



- ∞. Zugana jasotzen ditut **begiak**,  
zeruan errege zaren hor**rengana**. R̃.
- ∞. Nola morroien begiak nagusien esku**etara**  
eta neskamearen begiak etxekoandrearen esku**etara**,  
hala daude gure begiak Jaun**agana**,  
gure Jainkoagana, gutaz erruki dadin **arte**. R̃.
- ∞. Erruki gutaz, Jauna, **erruki!**  
Buruz gain gaude **mespre**ttuz,  
buruz gain ustetsu**en** burlaz,  
harroen irai**nez**. R̃.

### Bigarren irakurgaia (2 Ko 12, 7-10)

San Paulo Apostoluak Korintoarrei egindako gutunetik

Senideok: Neure burua den baino handiagotzat jo ez dezadan, haragian sartua dudan eztena eman zait, jo eta jo ari zaidan Satanasen ordezkaria, harro ez nadin. Hiru aldiz eskatu diot Jaunari, ken diezadala, baina hark esan dit: «Nahikoa duzu nire laguntza, nire indarra ahulezian gauzatzen baita bete-betean».

Pozik harrotuko naiz, beraz, neure ahuleziaz, Kristoren indarra bizi dadin nigan. Pozik nabil, beraz, Kristogatik jasaten ditudan ahulezia, laido, beharrizan, erasoaldi eta estualdietan. Ahul naizenean, orduan bainaiz indartsu.

### Aleluia (Ik. Lk 4, 18)



✠. Behartsuei Berri Ona ematera bidali nau Jaunak, gatibuei askatasuna hots egitera. ✠.

**Ebanjelioa** (*Mk 6, 1-6*)

## Homiliarako argibideak

*Bereen artean ukatua*

Jesus ez da Tenpluko apaiz bat, erlijioa zaintzera eta sustatzera emana. Ez du hartzen inork Lege-maisutzat ere, Moisesen Tora defenditzera emandakotzat. Galileako baserri-jendeak, haren keinu sendatzaileetan eta haren suzko hitzetan, Jainkoaren Espirituak eragina den profeta baten jarduera ikusten du.

Jesusek badaki bizitza zaila eta gatazkatsua izango duela. Erlijio-buruzagiek aurre egin diote. Profeta ororen zoria da. Ez du barruntatzen artean, hain xuxen bereek egingo diotela uko, haurtzarotik hobekien ezagutzen dutenek.

Esan daiteke, Nazareteko herrian Jesusi egin zioten ukoa oso komentatua izan zela lehen kristauen artean. Hiru ebanjelarik xeheki jaso dute pasadizoa. Markosen arabera, ikasle-talde bat lagun duela iritsi da Jesus Nazaretera, eta profeta sendatzaile baten fama duela. Jesusen auzotarrek ez dakite zer pentsatu.

Larunbata iristean, herriko sinagoga txikira doa Jesus. Eta «irakasten hasi da». Auzokoek eta familiartekoek doi-doi entzuten diote. Galdera-mota asko dituzte beren artean. Haurtzarotik dute ezaguna Jesus: auzotar bat gehiago da. Non ikasi du mezu harrigarri hori Jainkoaren erreinuaz? Nondik datorkio sendatzeko ahalmen hori? Markosek dio, «gutziz nahasirik zeuzkala». Zergatik?

Landa-jende hark uste du dena dakiela Jesusez. Haurtzarotik moldatu dute hartaz beren ideia. Beren aurrean agertu zaien bezala onartu ordez, hartaz duten irudiak blokeatu egin ditu. Irudi horrek ez die

utzi Jesusen baitan den misterioari bihotza irekitzen. Gogor egin diote harengan Jainkoaren hurbiltasun salbatzailea ikusteari.

Bada besterik ere. Profetatzat onartzeak, Jainkoaren izenean agertu dien mezua entzuteko prest egotea eskatuko lieke. Eta horrek arazoak ekartzen ahal lizkieke. Beren sinagoga dute, beren liburu sakratuak eta beren tradizioak. Bakean bizi dute beren erlijioa. Jesusen presentzia profetikoak herrixkako bakea hausten ahal du.

Kristauek irudi aski desberdinak ditugu Jesusez. Denak ez datoz bat hurbiletik ezagutu eta jarraitu ziotenen irudiarekin. Nor bere irudia dugu Jesusez. Irudi honek baldintzatzen du fedea bizitzeko era. Jesusez dugun irudia pobrea, erdizkakoa edo desitxuratua bada, pobrea, erdizkakoa edo desitxuratua izango da gure fedea.

Zergatik saiatzen gara hain gutxi Jesus ezagutzen?

Zergatik eskandalizatzen gaitu haren giza ezaugarriak gogoratzeak?

Zergatik egiten diogu gogor Jainkoa Profeta batengan haragitu dela aitortzeari?

Haren bizitza profetikoak geure elkarreak eta gu geu sakon eraldatzera behartuko gintuzkeela barruntatzen dugulako ote?

## **Jainkoaren herriaren otoitza**

Senideok: eska diezaiogun Jaunari entzun ditzala gure otoitzak:

- Egigun otoitz Frantzisko Aita Santuaren eta Jose Ignazio gure gotzainaren alde; Jaunak eman diezaiela adorea eta argia beren ardurapeko elkarreak santutasunez zaindu ditzaten. Eska diezaiogun Jaunari.
- Egigun otoitz Jaunak egiazko bakea eman diezagun; bakearen egiazko iturria denak eman diezagula bizikidetzak baketsua eta barneko espirituzko-bakea. Eska diezaiogun Jaunari.

—Egigun otoitz Ebanjelioaren bidean zintzo saiatzen diren guztien alde, Jaunak asmo horretan lagun diezaien; eta berekoikeriak Jainkoarengandik urruntzen dituenak izan dezatela bihotz berria iristeko grazia. Eska diezaiogun Jaunari.

—Egiogun otoitz Jainkoari hildakoen alde, bereziki gure senide, adiskide eta ongile hildakoen alde. Jaunak bere erruki handiz bere aintzan onar ditzan santu eta aukeratu guztien artean. Eska diezaiogun Jaunari.

Entzun, Aita guztiz santua, gure otoitzak eta argi gaitzazu Zure Espirituaren argiaz, behartsu eta ahulak garela ahaztu gabe Kristoren Piztueraren indarra goza dezagun. Errege bizi baita gizaldi eta gizaldietan.

### **Jaunartze-ondorengo otoitza**

**Mugarik gabeko zeure maitasunaren dohainez  
janaritu gaituzu, Jauna;  
egizu, lor ditzagula salbamen-fruituak  
eta bizi gaitezela beti Zu goresten.  
Jesu Kristo gure Jaunaren bitartez.**